

## **Communicaziun allas medias digl cumegn da Surses (nr. 04-2020)**

### **Surses: La scola primara a Savognin survign en provisorii**

**La radunanza communalà ò approvo en credit da fr. 340'000.00 per la construcziun d'en provisorii per la tgesa da scola primara Grava a Savognin. Uscheia vign migliurada la situaziun precara da plaz. An cursa è ossa er igl project per renovar ed angrondaneir la tgesa da scola actuala u scu varianta da biagier ena tgesa da scola nova a Savognin. Pinavant è igl suveran er ancletg da lascher privatisar la rezgia communalà e da far ena deponia da material.**

Cun angal ena cuntervusch ò la radunanza communalà concedia igl credit cumplessiv da fr. 340'000.00 per biagier en provisorii sper la tgesa da scola Grava a Savognin. Igl provisorii vign biagia cun QUADRINS dall'interpresa indigena Uffer SA e cumpeglia dus salvs da mintgamai 62 m<sup>2</sup>. Cun chel provisorii vign surlivgeida la situaziun precara da plaz ainten la tgesa da scola primara, tgi è neida biageida igl 1954. Siva la fusiun dallas scolas igl 2014 sa catta igl li da scola cun scoletta, scola primara e scalem superiour a Savognin. Igl davos onns èn igls basigns dalla scola per duple salvs carschias, cun porscher structuradas digl de e veaple instrucziuns supplementaras scu p.ex. lecziuns da taliang per igls scolaras da Beiva, lecziuns da rumantsch per unfants d'oters lungatgs, lecziuns per scolaras e scolaras cun talent ed unfants cun adattaziuns dallas fegnameiras. Chel provisorii duess sarveir anfignen tgi en project per sanar ed angrondaneir la tgesa da scola existenta u per la construcziun d'ena tgesa da scola nova a Savognin pò neir realisà. Chegl sarò prubablamentg igl cass an 3 anfignen 4 onns.

### **La rezgia communalà a Tinizong pò neir privatisada**

Cun fitg gronda maiortad ò igl suveran decidia da dar igl areal dalla rezgia communalà a Tinizong an dretg da biagier all'interpresa Uffer SA u ad ena societad tgi ò anc da neir fundada. La competenza per elaborar igls detagls digl dretg da biagier cun l'interpresa indigena è neida surdada alla suprastanza communalà. Anfignen chest aton duessan igls davos detagls esser sclarias. Tar en resultat positiv prevei la Uffer SA da realisar la premaveira 2021 en center logistic modern per lenna massiva.

La rezgia communalà ò igls davos onns betg ple savia neir manada da moda rentabla ed igl cumegn vess stuia ponderar da sarar ella. Cun privatisar la rezgia fissan las prestaziuns da sarvetsch ed igls products tradiziunals d'ena rezgia sieros er agl avigneir e la vendita da lenna radonda or digl gôt communal garantida.

### **Ulteriouras decisiuns**

Pinavant ò la radunanza communalà approvo unanimamentg la revisiun parziala dalla planisaziun locala per far ena deponia da material da stgavamaint sober cun en volumen da ca. 150'000 m<sup>3</sup> a Burvagn, Cunter. Chella revisiun stò anc neir approvada dalla regenza grischuna.

Er unanimamentg è nia do suatientscha alla dumonda d'en pèr marido da cumprar ena surfatscha da 949 m<sup>2</sup> giu d'ena parcella da biagier an possess digl cumegn da Surses a Badogna, Cunter, per biagier ena tgesa d'abitar. Chel taragn sa catta ainten ena zona per promover la construcziun d'abitaziuns per persungas tgi peglian domicil ainten la vischnanca da Cunter.